



Te whakareri mō te whakapikinga o te pae moana: Mōhiotia, tē mōhiotia hoki

Tirohanga whānui

Dr Jan Wright
Te Kaitiaki Taiao a Te Whare Pāremata
February 2017



Parliamentary Commissioner
for the Environment
Te Kaitiaki Taiao a Te Whare Pāremata

E ngā iwi o te motu, e ngā hau e whā. He mihi nui tēnei ki a koutou.

Whāia te iti kahurangi ki te tūohu koe me he maunga teitei.

Ko te tānga nei he whakamāoritanga o te Tirohanga Whānui mō te pūrongo *Te whakareri mō te whakapikinga o te pae moana: Mōhiotia, tē mōhiotia hoki i tāngia e Te Kaitiaki Taiao a Te Whare Pāremata i te tau 2015*. Ko te pūrongo katoa kei te wāhi ipurangi www.pce.parliament.nz, ā, kei te tari o Te Kaikomihana te tānga pukapuka.

Tirohanga whānui

He rangi mokopuna te Rātapu te 14 o Hune i Te Whanganui a Tara i tēnei tau, kāore he hau.

I ngā rangi torutoru pēnei, whakapapa pounamu te moana.

3

Engari, ka tiro iho ahau ki Te Whanga o Lyall, ā, ohorere ana au kia kite i ngā ngaru hukahuka e pakaru ana ki tātahi me te huarahi. Ka maheu ngā kōhatu e rite ana te rahi ki te pāhiketepōro ki te papa waka.

Tērā te āwhā nui i Te Tonga o Te Moananui a Kiwa i whakaputa i ngā ngaru nunui rawa i haere mō e hia ngā rau kiromita, ka ngoikore haere engari kāore i aukatia. Nāwai rā, ka eke ki runga i ngā tai a Kupe, ā, whati rawa ki te tai tonga o Te Whanganui a Tara.

He wāhanga paku noa tō te pikinga kē o te pae moana i puta i taua āhuatanga i Lyall Bay i taua rā, engari ina piki tonu te moana, ka maha ake ngā wā waipuke e ai ki ngā kaipūtaiao.

Ko te taitara paku o tēnei rīpoata ko ‘Mōhiotia, tē mōhiotia hoki’.

Kei te mōhiotia e piki ake ana te moana, ā, ka pērā i ngā rautau e heke mai nei.

Engari he nui kāore i te mōhiotia – te tere o te piki, ka pā pēhea ki tēnā takutai, ki tēnā takutai, ā me pēhea e whakareri?

Ā, me whakareri tātou.

Nā, e ai ki tētahi tuhinga kei roto i te New York Times i tēnei tau: “Human civilization is built on the premise that the level of the sea is stable, as indeed it has been for several thousand years”.

Mā te pikinga o te pae moana e waipuke ai te whenua o te takutai e tata ana te teitei ki te pae moana, te ngāhorohoro o ētahi tātahi me ngā paripari ngāwari, ā, ka piki ake te wai tote i raro i te whenua.

- Ka maha ake ngā waipuke i ngā wāhi takutai, ka kino rawa, ka whānui rawa.
- Ngāhorohoro – he raru kua roa e mōhiotia nei i ētahi o ō tātou takutai – ka whānui rawa.
- Ko te wai i te whenua e tata ana ki te moana ka piki, ā, ka tote pea te wai.

Heoi anō, me tūpato te whakawhānui i te kōrero. He mea nui ngā āhuatanga i tēnā wāhi, i tēnā wāhi.

Hei tauira, ka tukia ngā takutai kore haumaru e te kaha o te moana, nā reira ka paraheaea atu ki te waipuke i ngā whanga e haumarutia ai.

Ko ērā tātahi e whakakīa ai ki te parakiwai, kāore e nui rawa te ngāhorohoro.

Ko ngā raru mō te wai whenua ka puta ki roto i te whenua kua puta mai i te moana.



Nā: Anne Te Wake

He maha ngā marae me ngā wāhi tīpuna i te taha moana i runga i te whenua papatahi. Ko Mātihetihe marae tēnei, i te taha moana, ki te taha raki o te Whanga o Hokianga. Ko te hapū nei, Te Tao Mauī nō Mitimiti e mahi tahi ana me NIWA kia mōhio ai ka pā pēhea te pikinga pae moana ki tō rātou marae.

Ko ngā whakararu o te taiao, pērā i ngā rū whenua, i ngā pahū maunga me ngā waipuke awa ka taea te puta i ngā wā katoa.

He rerekē te pikinga o te pae moana he itiiti, e kore e taea te aukati. Ka āta puta mai ngā whakaaweawe ki tō tātou takutai mō tētahi wā, ā, ka tere puta mai.

Me tīmata tātou ki te whakamahere, engari kei te toe te wā ki te whakamahere tika rawa.

Kāore e kore ko te ao, ko Aotearoa nei hoki, me mahi wawe ki te whakaheke i te whakaputaputa i te hauhā me ētahi atu putanga haurehu kati mahana.

Heoi anō, i a au e rangahau ana, kua mōhio au kāore e pērā rawa te kōhukihuki mō te whakamahere me mahi tātou mō te pikitanga o te pae moana.

Nā, he kino pea tō te mahi wawe i ētahi wā.

Ko tā te kāwanatanga he tohutohu, he tautoko i ngā kaunihera, engari kua tae te wā mō te tirohangā whānui.

Ko ngā kaunihera kua tīmata ki te whakamahere mō te pikitanga pae moana kua kitea he kōwhiringa uaua rawa.

I ētahi wāhi huri noa i te motu, kua whakahēngia ngā kaiwhiwhi whare te whakarite i ngā takiwā takutai whakararu kua hangaia i runga i ngā matapae mō te waipuke ā ngā wā ki mua me te ngāhorohoro.

He mea ohorere te pānui i te reta e kī ana kei roto tō kāinga, whenua rānei i te rohe kua whakaritea hei rohe e waipuketia, e ngāhorohorotia ai rānei.

Ehara i te mea he pūtea noa iho te kāinga.

Ko te whakarite rohe pēnei, me ngā waeture e whai ake nei me noho i runga i te tukanga tika me ngā whakamātautau hangarau e āta whakaarohia ana, e mārama ana.

Ahakoa me pēnei ēnei mātāpono mō te whakamahere e pā ana ki ngā mōrearea i raro i te Resource Management Act, kāore ō tātou wheako mō te pikinga o te pae moana - kāore tō tātou paku mōhio.

Ko tētahi huarahi kia matatika ake te whakahaere, me āta haere, ā, me wehewehe noa te whakahaere.

Koinei te take i whakaaro au ki te tāpiri i ngā mahere tairanga e whā ki tēnei rīpoata, ā, tērā ētahi atu i runga i tō tātou pae tukutuku.

Ehara tēnei i te whakataunga ngāwari, nā te mea, kāore au e pīranggi kia ohorere te tangata mō te kore noa iho.

Engari ko te wāhanga tuatahi o te tukunga e āta haere i tēnā wāhanga, i tēnā wāhanga, ko te tuku i te pārongo, ā, me tīmata ki ngā mahere tairanga tika o te whenua takutai.

Me mōhio rawa ehara ngā wāhi e whai kara ana i runga i ngā mahere i tēnei rīpoata i ngā takiwā whakararu takutai; ka whakaatu noa i te tairanga i runga ake i ngā tai pari o te Kōanga.

Ko te tātaritanga i whakamahia ki te whakaputa i te pārongo mō ēnei mahere e whakaatu i te iwa mano kāinga, neke atu rānei e noho ana i te whenua iti iho i te 50 henemita ake i ngā tai pari o te Kōanga.

Neke atu tēnei tatau i te nama o ngā kāinga i noho ki te rohe whero i muri i ngā rū i Ōtautahi.

Me mōhio ki te rerekētanga o te mahi o ngā kaitātari hangarau e mahi nei i te aromātai whakararu takutai me te mahi a ngā kaiwhakawā e nohonoho nei i ngā tēpu kaunihera.

Nā te mea ko te kaupapa here o te kāwanatanga mō te pikinga o te pae moana e āta whakamārama i te hiahia ki te whai i te tukanga whakatūpato, ko ngā kaitātari hangarau kua whakaū i te whakatūpato ki ngā aromātai whakararu takutai, heoi anō he rerekētanga tō tēnā, tō tēnā.

Ki ētahi ka whakaritea i runga i te whakaaro ka piki ngā pae moana ki ngā pikinga tino teitei.

Engari he rerekē te aromātai whakararu takutai ki te whakaahua i te whare, i te arawhata rānei. Ko te urunga o wāhanga tautoko me ngā āhuatanga haumaru me noho tahi me te whakaahua.

Ko ngā aromatawai hangarau mō te whakararu takutai me noho ki ngā āwhiwhiwhi pai o ngā tawhā me ngā whakapae i tukua ki te tauira.

Me titiro ngā kaiwhakawā ki ngā putanga tauira me ngā āwhiwhi o ngā kaupapa tē mōhiotia. Kātahi anō, ka whakatau me pēhea te tūpato i te whakarite i ngā takiwā whakararu takutai. Me whakaatu, me mārama rawa te tukanga whakatau.

Ko te kōrero mārama tētahi wāhanga nui o te tukanga pai – me whakarite i te reo mārama – he reo e whakakapi i te āpiti i waenganui i ngā pukenga me mātou.

I tētahi rīpoata, ka puku kata au kia kite i te āwhā e kīa nei ko ‘te heke wai nui i te wāhanga o te rā’.

Me kua rawa e kōrero mō te mea ‘kotahi i te 50 tau’, te ‘kotahi i te 100 tau’ rānei.

Kāore e tino mārama, waihoki kāore e noho hei tauine ūrite i ngā wā katoa.

Ko te tino pikinga o te wai i runga i te kaha o te tūpuhi i runga ake i ngā Tai ā Kupe i whakaarotia ka puta mai ia 100 tau, ka putaputa mai mehemea ka piki ake te pae moana.

Ko ētahi āhuatanga o te whakamahere i te pikinga o te pae moana me mahi ināia tonu nei.


Ko tētahi ko te hoatu i te whakaaetanga ki te whakaahu hou. Ko ngā tāone iti me ngā rauemi tautoko tāone utu nui e hiahiatia ai, he whakangao mō te wā roa.

I tēnei wa ka mōhio mātou ko te hanga tāone iti i runga i te whenua ka waiwaitia he mahi pōhēhē rawa. Me mōhio hoki tātou ko te hoatu i te whakaaetanga ki ngā tūtanga hou i runga i te takutai pānekeneke he mahi pōhēhē hoki.

Ko tētahi atu ko te whakatū i ētahi atu pūnaha aroturuki whānui. Me whai tātou i ēnei i mua i te whakawhanake i ngā tauira pai o te ngāhorohoro me te whakatāpiri o te takutai. Ko te aroturuki pēnei he mea nui mō te whakahāere urutau, koinei te rautaki tika i ētahi wā. Ko tētahi āhuatanga o te whakahāere urutau ko te mahi whakauru i ngā wā ka tae ki tētahi taumata hou.

Ko te mea rerekē, ko tētahi o aku tūtohu i roto i tēnei rīpoata he tohutohu ki te Minita Pūtea. Ehara i te mea he moata kia whakaarohipa ngā āhuatanga e puta mai i te pikinga o te pae moana. Ka putaputa mai ngā tono ki te kāwanatanga me ngā kaunihera mō te pūtea – ahakoa mō te hanga maioro moana, te tiaki i te huarahi takutai e ngāhorohorotia ana, te nekenekē rānei i ētahi hapori ki te tuawhenua (he mea ka mahia ā tōna wā).

I a au e tuhi ana i tēnei, he māngai mai i ngā motu maha o te ao e tata ana ki te hui i Parihi ki te whakamātau ki te whakarite i te whakaaetanga kia whakapōturi i te tere o te panoni āhuarangi. Kei te manawa ora tonu au. Ko te mahi a te ao katoa i tēnei wā, me ā tō tātou motu ririki nei, ka pā ki te tere, ki te pōturi rānei o te pikinga o te pae moana.



Dr Jan Wright

Te Kaitiaki Taiao a Te Whare Pāremata



Tō mātou kaupapa

Ko Dr Jan Wright Te Kaitiaki Taiao a Te Whare Pāremata. He Āpiha Pāremata motuhake, he whānui tōna mana ki te rangahau i ngā āwangawanga taiao, ā, ka tū motuhake ki te kāwanatanga o te wā.

Kāore Te Kaikomihana e tuku pūrongo ki tētahi Minita nō te Kāwanatanga, engari ki te Pāremata whānui, arā ki te Pika o te Whare me ngā Āpiha o te Kōmiti Pāremata.

He ahurei te mahi a Te Kaikomihana, ā, he tino rerekē ki ngā mahi a ngā pokapū kāwanatanga taiao, pērā i Te Manatū Mō Te Taiao, Te Mana Rauhī Taiao me Te Papa Atawhai.

Ka rangahau Te Kaikomihana i ngā āhuatanga taiao e kōwhiria ai e ia. Ka tautokohia ia e āna kaimahi pūkenga whānui, ka āta whakawā ia i te taunakitanga kua kohikohia i ngā takenga maha. E mōhiotia whānuitia ko āna mahi he mārama, ka puta mai i runga i te kōrero pono, ā, ka taea te whakamahi.

Ā mātou mahi

Ko te tino mahi a te Kaikomihana he hoatu kupu āwhina motuhake ki te Pāremata.

I tutuki ai tēnei i ngā huarahi maha:

Pūrongo mō ngā rangahau. Ko te katoa o ngā pūrongo o te Kaikomihana i whakatakotohia ki te tēpu i roto i te Pāremata e te Pika. He tūtohu mō te tīni tō ētahi pūrongo, he whakaako kē tō ētahi atu.

He tāpaetanga ki ngā kōmiti whiriwhiri mō ngā pire, ngā uiuinga me ngā pitihana. I ētahi wā ka tuku tāpaetanga ki ngā marohi kaupapa here, hei tauira ko ngā rerekētanga marohi ki te Resource Management Act.

Ko te katoa o ā mātou mahi e tautoko ai i te whāinga a te Kaikomihana kia pupuri, kia whakapai ake rānei i te taiao o Aotearoa mā te tīni i te whakaaro o ngā kaiwhakatau i te kupu āwhina motuhake kua āta whakaarotia.

Kia whakaaetia, kia whakaaweawe te kupu āwhina a te Kaikomihana me tū motuhake, me ngākau tapatahi, ā, me tino tika te rangahau a te tari.

Ko ngā whakataunga ki te tīni i te ture taiao, kaupapa here me ngā whakahaere rōpū he kaupapa mā te Pāremata, te kāwanatanga me ngā kaunihera. Ko te whakamahi i ēnei whakataunga me te aroturuki i te whakaaweawe i runga i te taiao te takohanga a ngā pokapū kāwanatanga.

Tā mātau koromaki, ā mātau uara

Tā mātau koromaki

He pupuri, he whakapai ake i te taiao ki tērā e tika ana mā te tuku tohutohu motuhake whai kaha e mārama ai ngā whakatau.

Ā mātau uara

Hiranga – ko ā mātau pātai me ngā whakautu he ū ki te putaiao matatau, he mārama hoki. Ka noho haepapa mātau ki te iwi o Aotearoa me te tuku uara mō ngā pūtea ka whakawhiwhia mai.

Manawa nui – he kaha te tuku pātai kia pai ake ngā āhuatanga. Ka ngana mātau ki te whakaputa i ngā hua o ā mātau mahi mā ngā tikanga rerekē kia kaha ai te whai take.

Te wairua manaaki – ka mahi tahi mātau i runga i te mana ōrite, te whakawhititanga, te āta whakarongo, ā, kia kaua e pukā te whakawā. Ka whakaae ki ngā whakataunga me ngā mahi e hua ai te taiao.

Auahatanga – nā te pararau kore e tuwhera, e auaha te whakaaro. Ka ngana ki te whakatika raruraru, kaua te noho i roto i te pōuri.

Tōtikatanga – ka pono, ka ora hoki te tangata i ā mātau tohutohu. Ko ngā pānga, he pūmau te whai hua ki te taiao o Aotearoa.

Ko koe ki tēnā, ko ahau ki tēnei kīwai o te kete.

Tēnā tātou katoa.